

Radunonzas cantunales a Glion e Flem

■ (anr/abc) Treis radunonzas cantunales ein proximamein a Glion e Flem. L'emprema ei vendergis, ils 17 da matg a Glion. L'Associaziun grischuna dils possessurs da casas s'entaupa il suentermiezgi allas 14.00 ella claustra dallas soras dominicanas alla 38avla radunonza da delegai. Suentar las tractandas usitadas vegn il niv directur dall'associaziun svizra, Markus Meier, a seprentar e render attent als survetschs ed all'impurtonza dall'uniun nazionala. Cun 330 000 commembers s'auda quella tier las grondas organisaziuns d'interess en Svizra.

Il gi suenter, sonda, ils 18 da matg ei la secziun Rezia da Domus Antiqua Helvetica igl entir gi a Glion. Ei setracta dall'associaziun da possessurs da casas historicas. La radunonza ei ella sala dalla casa pervenda reformada el marcau vegl. Suentar la part statutarica han ils participonts caschun da visitar casas historicas ella vischinonza. Suentar il gentar ell'ustria Obertor cuntinuescha il program cun visitar casas privatas historicas da Glion. La dieta finescha cun in aperitiv el Cinema Sil Plaz. Actualmeins presidiescha Nina von Albertini da Dusch/Pasqual la secziun Rezia da Domus Antiqua.

La tiazra radunonza cantunala ei a Flem, e quei ils 15 da zercladur 2019. L'Uniun grischuna da skis festivescha uonn siu 100avel anniversari. Ella commemorescha quei duront la radunonza da delegai ella halla da curling a Flem. Il program festiv a Flem entscheiva allas 18.00 cun in aperitiv, allas 19.00 suonda la tscheina. Il vast program da divertiment moderescha il reporter da radio Bernhard Schär. Divers victurs olimpics e campions mundials vegnan era ad esser presents, ei dat blocs cun plaids, discuors al podi sco era la presentaziun dalla cronica en fuorma d'in cudisch.

Ils novs migiurs dil Bündner Rigi

■ (anr/abc) Culla fin dalla stagiun d'uniern 2018/19 han ils ustiers dil hotel Bündner Rigi al Péz Mundaun, Audrey ed André Schaub, bandunau il cuolm. La famiglia haveva surpriu la primavera 2011 il menaschi ed attratg l'attenziun cun ina cuschina innovativa ed apprezzada. Sco quei ch'igl ei vegniu enconuschent dacuort daventa André Schaub niev vicedirectur da Viamala Turissem e successur da Stephan Kaufmann. Da niev sorprendan Stefan e Fabian Brunke il menaschi gastronomic sut il Péz Mundaun. Igl 1. da zercladur 2019 ei l'avertura dil hotel. Gia l'entschatta matg havessen ils frars envidau ad in aperitiv d'avertura sil Bündner Rigi. Pervia dall'aura brutta han els dislocu quel giu ella val. Gliendisgis vargau ein Stefan e Fabian Brunke seprentai el tschaler da vin dils frars Oswald a Glion. Stefan Brunke, da Wattwil SG a Sursaiisa Mundaun, ei s'enscretz ils 24 d'avrel sco meinagestiu el register da commerci culla firma Brunke Gastro & Hotel cun sedia a Surcuolm.

«yuli» presenta moda el casti da Rehanau

Sonda muossa Anna Laura Klucker sias creaziuns da moda al publicum

■ (anr/sr) Dapi biebein in onn producescha la designra Anna Laura Klucker sias creaziuns sut igl agen label da moda «yuli». Ils 11 da matg presenta la giuvna da 23 onns sia moda. Quei a caschun d'ina gronda revista da moda publica el casti da Rehanau. Igl ei si'emprema atgna revista da moda per la publicitad. Siu siemi d'in agen label ha Anna Laura Klucker realisau el rom da sia lavur da bachelor alla Scola d'art a Turitg. «Cun mia moda sperel jeu da saver far plascher als visitaders», di Klucker ch'ei oriunda da Tumein.

Tradiziun e moderna

Tradiziun s'entaupa cun moderna. Per siu label ei Klucker oravontut spespecialisada sin moda da nozzas e fiastas. Sco ella declara ha quella moda marvegliusa ed empau sco ord ils siemis gia fascinau ella en giuvens onns. A caschun dalla revista da moda el casti da Rehanau sa la giuvna designra da Tumein presentar vestgadira ord treis collecziuns sco era ord in agen sortiment da vestgius da nozzas. Ina caratteristica dalla moda da «yuli» ei la cumbinaziun harmonica denter tradiziun e moderna. Aschia vegn la moda da Klucker probablamein adina pusppei ad esser influenzada da musters tradiziunals sco per exempel il petg da crusch grischun ni la moda da costumes ch'ei d'impurtonza historica. El medem mument ein las creaziuns da «yuli» era influenzai dalla moderna – perquei che la designra ha decidu da buca far caltschiel quels musters, mobein d'aplicar tals sils unics ord tul cun agid d'in plotter da tagliar ed aschinunada «Flockfolie».

Pissiu per la moda

Tenor in communicau als mieds da massa ha Klucker scuvretg gia baul per ella sia pissiu per la moda ed il cuser. Per resummar mo cuort pudess ins numnar quei la via naven dalla creaziun dil vestgiu da



In vestgiu da nozzas dalla giuvna designra Anna Laura Klucker da Tumein. El casti da Rehanau muossa ella sonda sias creziuns dil label da moda «yuli».

confirmaziun entochen tier l'atgna revista da moda. Sia pissiu per la moda ha Klucker numnadamein scuvretg sil pli tard lu cu ei seschava buc anflar in vestgiu per la confirmaziun tenor sias ideas – aschia ch'ella ha fatg cuortas ed ei sedecidida da crear senza siu vestgiu da fiasta. Suandadas ein creaziuns per confamiliars ed amitgs sco era ina adina pli e pli gron-

da fascinaziun e pissiu pil tema design da moda. Ina fascinaziun ch'ha anflau sia successiu cul bachelor «Art Education» alla Scol'aula d'art a Turitg e la fundaziun digl agen label da moda.

Revista da moda «yuli» – Vestgadira da nozzas e fiastas, sonda, ils 11 da matg allas 20.00 el casti da Rehanau. Ulteriuras informaziuns sin www.yuli.ch

Spescha Dance presenta

■ (anr/abc) Damaun, sonda, e dumengia, il di dallas mummas, envidan 61 matatschas e giuvnas dunnas ad ina sera da divertiment ella halla plurivalenta a Vella. Spescha Dance, cun Gionina, Marianna e Fabiola Spescha, presenta ina show cun produziuns da sault. Tuttas sis gruppas ein puspei semtgadas da mussar quei ch'ellas han exercitau dapi igl atun vargau. Las participontas, naven dalla scoletta tochen tier la gruppa Move System dallas soras Spescha, presentan in program cun coreografias e musica. Avon la pausa saultan las gruppas cun tocs da musica moderna e dils charts actuals. Ella secunda part dat ei produziuns tier la tematica «Rock». Igl ei la secunda gada che Spescha Dance organischa quell'occurrnza per egl ed ureglia. Igl onn vargau havevan 52 matatschas e giuvnas dunnas mussau ina show dinamica, uonn eis ei 61 che presentan lur plascher dil moviment, coordinaziun e fitness. En tut san ils aspectaturs guder 15 tocs, in maletg sustegn mintga coreografia tenor il tetel dil toc.

La sera da Spescha Dance a Vella ei sonda, ils 11-5-2019 allas 19.00, e dumengia, ils 12-5-2019 allas 16.00, mintgamai in halla plurivalenta a Vella.

Fiasta ecclesiastica a Trin

■ (anr/abc) Dapi decennis s'entaupan las pleivs evangelicas dil Colloqui Sur igl Uaul mintgamai il firau d'Anceinza alla fiasta ecclesiastica. Uonn envida la pleiv evangelic-reformada da Trin gievgia, ils 30 da matg a quella scuntrada. La fiasta ecclesiastica entscheiva allas 10.00 cun in survetsch divin ella baselgia da Trin, quei cun participaziun dil Chor mischedau Trin. Suentar dislochescha la raspada ella halla polivalenta a Trin nua ch'ei dat in aperitiv. Silsuentar survescha la pleiv, cun agid dil chor mischedau, il gentar. Il suentermiezgi dallas 13.30 tochen allas 16.00 han participontas e participonts caschun da visitar duas attracziuns da Trin. Inagada ei quei l'anteriura fortezia militar a Trin-Porclis. L'autra attracziun ei el vitg da Trin ella Casa Mesaglina. Leu san ina dar in'egliada ed imprendier d'enconuscher igl albiert da giuventetgna e la sedia dil Project Uaul da muntogna.

FLEM

Decoraziuns cun trucs e donaturs

(anr/abc) La vischnaunca da Flem vul seprentar duront la stagiun da stad en in bi vestgiu decorativ e curteseivel. Per quei intent metta igl Uffeci da baghegiar da Flem a disposiziun alla populaziun plazs per plantar fluras. L'acziun ei limitada sil tschancun dalla Via Nova e Promenada denter Flem Vitg e Casa d'Uaul. Mintga famiglia ni persuna singula che separticipescha retscheiva in begl unitar e persunal, ina plachetta cul num da donatura ni donatur duei dar l'identificaziun agl «iert» alpin. Tgitar e plantar sez ston ils donaturs denton buca lur decoraziun persunala per Flem, quella lavur surpren la vischnaunca. Naven dalla fin da matg san ins admirar ils trucs cullas fluras regaladas.

In viadi musical ell'Eritrea

Samuel Mesfin concertescha a Mustér

■ (anr/hh) Il Forum intercultural Mustér porscha gievgia, ils 16 da matg 2019 in concert cun Samuel Mesfin el Center sursilvan d'agricultura a Mustér/Salaplana.

Igl ei aschidadir in viadi musical atras l'Eritrea. Mesfin suna in instrument che porta il num «krar». Igl ei in instrument a corda che vegn sunaus surtut ell'Eritrea ed Etiopia. Mesfin viva dapi treis onns en Svizra, il mument el center da transit Bellavista a Mustér. El suna siu intrument en ina moda migeivla, melanconica e cun gronda pissiu.

Leutier conta igl um giuven ella vegliadetgna da 26 onns canzuns els lun-



gatgs tigrinya e tigre. Ell'Eritrea ei Mesfin seprentaus regularmeins a concerts, en Svizra ha il giuven musicist aunc buca giu quella caschun entochen ussa. Il concert a Mustér ei pia aschidadir siu debut.

En quei connex vegn era purschiu te dall'Eritrea e la caschun da star da cumpignia e menar discuors interculturalis.

Il center ei aviarts naven dallas 19.30, il concert entscheiva allas 20.00. Entrada libra, collecta.

Samuel Mesfin concertescha per l'emprema ga en Svizra.

Banca Chantunala Grischuna

■ (cp) Il 38. concert annual da la Musica instrumentala da la Banca Chantunala Grischuna (BCG) ha lieu venderdi, ils 10 da matg 2019. Entschatta è a las 19.30 en l'Auditori da la BCG a la Via Engiadina 25 a Cuira. Ils concerts da la Musica instrumentala da la BCG vegnan apprezzads fitg. La produziun è gratuita. Al concert da quest onn vegn il dirigent Hendri Riedi a delectar cun sias musicantas e ses musicants tras melodias enconuscentas u main enconuscentas. Il repertori stat entirmain en l'ensaina da ses dirigent che timuna cun success la musica da la BCG dapi tschintg onns. Perquai vegnan spezialmain ils highlights da Riedi durant ils onns passads presentats.



La Musica instrumentala da la BCG.

René Buchli candidescha

■ (anr/abc) Vendergis, ils 31 da matg s'entaupan ils chors sursilvans alla radunonza da delegai. Il Chor mischedau Ruschein envida alla sentupada annuala ella halla Crestas.

Uonn ei la midada dil presidi el center. Suentar esser staus 17 onns al tgamun vegn Ewald Vinzens a surdar siu post ad in successur. Sco candidat sa la supras-tonza proponer René Buchli da Laax. Quel ei commember dil Chor viril Laax ed enconuscha bein la scena da cant dalla Surselva.

Essas Vus gia commember?

Procap Grischun
Hartbertstrasse 10, 7000 Cuira
Tel. 081 253 07 07, PC 70-7755-0
www.procapgrischun.ch

per persunas cun handicap

procap grischun